


Fasnacht 2013

Mutze-Bebbi Bärn



Au bi dr Fyyrweer gnallts

1. Auguscht – es git e Fescht,
d Basler Fyyrweer grillt fir Gescht!
Und will me so bim zämme sitze
nit guet ka mit Wasser spritze
dien zwai Büro-Pyromane
as Attraktion e Gnaller blaane:
Dr Gnaller gnallt dass d Schyybe klirre,
in Spittel muesch will d Oore schwirre!

Seesch an dene GnalliBäle dass Spitze-Spritzer mir do zaale.

Statt Wasser geege Flamme z spritze,
dr Voltablatz vom Brenne z schitze
duet d Basler Fyyrweer ummesitze,
will Regierungsspitze gaischesblitze:
E Wasserbad wurd dene Fritze,
wo Pneu aazinde-n-und au schlitze,
wo randaliere und stiebitze,
emänd no schade-n-und nit nitze.

Basel brennt und alles pennt, wills alle gfallt, wents richtig gnallt.

Dr Hanspi Gass verliert dr Gspass:
Syy Fyyr isch wägg, es het kai Zwägg,
är losst sich pensioniere.
Dr Baschi Dürr, ganz diir, gspyyrt s Fyyr,
mit „auf ein Bier mit Baschi dear“
duet är gärn missioniere.
Dr „ckdt“ i Gst vo dr LDP
will Pazifische nit regiere gsee
und duet sich dorum hintersinne
as Zivil-iiber Zuvieldienst het kenne gwinne.

Basel brennt und alles rennt, wills alle gfallt, wents richtig gnallt.

In Basel glimmt jetz Liebesgluet.
Dr alte Dante wallt scho s Bluet,
und au dr Rammel mit dr Faggle
duet „Gell du wählisch mi? Gell du willsch mi?“ staggle.
Bi so vuy! Stadt und Land-Symbiotik
bruuchsch nie mee Psycho-Philo-Pädagogik.
Dr Eymaa schafft das Schuelfach ab
und maint denn stolz zem Morin Guy:
Die „spürsch-mi“-Zyt isch jetz verbii -
Tripple-A statt Tripple-P!

Dr Vasella maint do gnapp: E Gross-Fusion? No wart ys ab!

Au d Banggwält isch ai Flechebrand,
Milliarde hänn die gsetzt in Sand.
D Kashya faart iire Hildebrand
as cash-ja! Zokkere an d Wand.
Mit em Kweku Adoboli
verliert d UBS im Monopoli.
Dr Grübel grüüblet: Yych mues go,
denn mi Bangg brennt lichterloo!
Will jede wo-n-yych ha entloo
fir d Schwoobe het e CD gnoo!

Lieb Gott zaig mir ein Wegelin zem wyter Styre hinterzien.

Gnalle duets au, mangels Fyyr,
in dr Sportwält, gräll und dyrr:
Dr Hei-go Vogel het miesse hai,
dr Arm-strong het dopt die z miede Bai,
Swiss-Ski startet ooni z lande,
die hänn dä Hockey „lock-out“ falsch verstande.
Au geege Vogel-Gripen hilft kai Impfe,
s hilft kai Tamiflu, kai Schimpfe.
Schafft er s denn und fliegt mit Yyberschall
gits e grosse Gnall.
Sunscht au.

p.s. Lieber Mitt Romney als Ooni Bama.

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge!

D'Zeedellääsete isch am Sunntig noo dr Fasnacht
am 24. Hornig in dr Baseldytsche Bihni, 17–19 h.

www.mutze-bebbi.ch